



Midament en la direcziun da l'anr

■ (cp) **Martin Gabriel dat suenter stgars quatter onns giu il presidi dal cussegl da fundaziun da l'anr. Sia successiun tar l'Agentura da novitads rumantscha (anr) surprena il deputà da la Val Schons Gian Michael.** Il mais december 2014 aveva *Martin Gabriel* surprenì il presidi dal cussegl da fundaziun da l'anr da *Jon Domenic Parolini*, il qual era vegnì elegì en la regenza grischuna.

Suenter che Gabriel era vegnì elegì la primavaira da l'onn passà sco nov secretari general da la Lia Rumantscha aveva el annunzià sia dimessiun sco president dal cussegl da fundaziun da l'anr. Sco soluziun transitorica è el dentant restà en uffizi fin uss. Sco ch'il president dal cussegl da fundaziun da l'anr partent ha declerà èn stad las lavurs en connex cun il salvament da La Quotidiana ed en connex cun quel la procuraziun dals meds necessaris tar confederaziun e chantun ils muments ils pli marcants durant ses temp d'uffizi. Sco represchentant da la Lia Rumantscha resta Gabriel vinavant commember dal cussegl da fundaziun da l'anr.

A chaschun da sia ultima sesida ha il cussegl da fundaziun da l'anr elegì *Gian Michael* sco nov president. Michael ch'ha 50 onns è pur a Donat, commember dal cussegl grond e schef da fracziun da la pbd. «Sper la scola èn ils meds da massa bain ils elements ils pli essenzials per il mantegniment e la promoziun da la lingua rumantscha», è il nov president dal cussegl da fundaziun da l'anr persvas. Ils meds da massa èn tenor el actualmain en ina fasa da gronds midaments. Quai pertutga, sco ch'el di, spezialmain er ils meds da massa rumantschs. «Jau ma legrel da-

mai da pudair sco president dal cussegl da fundaziun da l'anr ma participar activamain en ina fasa decisiva al project 'Medias rumantschas 2019', ha declerà il politicher da la Val Schons.

L'Agentura da novitads rumantscha è vegnida fundada il zercladur 1996 ed ha cumenzà l'entschatta da schaner 1997 cun la cumparsa da l'emprima ediziun da la gasetta dal di La Quotidiana sia lavur operativa. L'agentura da novitads ha la finamira da sustegnair ils meds da massa rumantschs. L'anr furnischa als meds stampats rumantschs La Quotidiana, «La Pagina da Surmeir» e la «Posta Ladina» sco er als meds electronics mintga di contribuziuns en furma da texts e fotografias. Questas contribuziuns vegnan scrittas tant en tut ils idioms rumantschs sco er en rumantsch grischun. Ils idioms vegnan utilisads per novitads localas e regiunalas, da la lingua da scrittira rumantsch grischun vegni fatg diever cur ch'ils texts sa drizzan a tut la cuminanza linguistica. Cun sia purschida vasta è l'anr daventada ina posa impurtanta dals meds da massa rumantschs, surtut dals meds stampads.

Operativamain vegn l'anr manada da *Guido Jörg*. L'agentura da novitads dat lavur a diesch collavuraturas e collavuraturas cun in pensum da lavur da 770 perschient da plazzas da lavur cumplainas. Ultra da quai èn divers collavuraturas e divers collavuraturas libers en la Surselva, la Val Schons, l'Engiadina sco era giu la Bassa activs per l'anr. Plazzas da lavur sa chattan en la redacziun centrala a Cuir sco er a Mustér, Cumpadials, Vuor, Sagogn, Sur, Zernez, Scuol, Uznach e Berna.